

Mexiko lindori jarriak

I

DFtik hasi eta
Guanajuatoraino buelta.
Hondartzan egun batzuk eginda
tarteka-tarteka
gora-goraino beteta
ekarri arren maleta
argazki batzuk ekarri ditut
barruan gordeta.



IV

Chiapas eta Oaxaca
malkoak, gerra, zarata.
Askok ez dauka eskolarako
diru ez zapata.
Nahiz ta zorroztu ezpata,
nahiz kalean eman lata
Mexikon ere gutxik jateko
zatitzen da tarta.

II

Erdian Teotihuacan
beherago Monte Alban
Palenquen gora Chichen Itzara
bidean Ek Balam.
Mayen bideetan hegan
altxor handiak daude han.
Harriek berba egiten dute
ta gainera zelan!

V

Hernan Cortesen konkista
ez zela izan polita,
leku askotan usaindu leike
arreta jarrita
baina euskaldunen lista
errepatatzen hasita
sentitu nintzen txiki, lotsati
eta hipokrita.

III

Karibearen zaindari
Tulum itsasora adi:
ur turkesei begira poza
emanez bistari.
“Kamarero, zerbeza bi!”
barrua pozik, kantari:
“Gaurko aukera zinez eskertzen
diot bizitzari”.

VI

Ikusi ditudan gauzak
—berdin zuriak zein baltzak—
garrantzitsuak izango ziren
guztiak niretzat.
Behintzat susmo hori daukat
hala sentitzen dut behintzat:
Nonbait gordeta badaukadala
Mexiko txiki bat.